



Di 4 Hofi Literario: Un delicia di Poema y Musica

Simia di Glas otorga na Lio Booi como reconocimiento pa su aporte na cultura di Aruba



ORANJESTAD(AAN)—

Diasabra anochi Hofi Literario pa di cuatro biaha a afirma y consolida su presencia como luga di encuentro pa poeta, escritor, musico y demas amante di literatura, arte y cultura en general riba nos isla. Hofi Literario den curason di Pos Chikito a nace na Scol di Idioma for di imaginacion creativo y proactivo di Yolanda Croes. Pa hopi tempo Yolanda tabata cana rond cu e deseo pa trece su conciudadanonan hunto pa medio di literatura y musica. Pa asina comparti y convivi cu otro, e arte di palabra y pa na mes momento yuda na desaroyo di nos idioma Papiamentu. Cu aporte di su colega docente di Papiamentu Creativo e tempo ey, a duna contenido practico na e anochi literario y cultural aki. Asina Hofi Literario a habri su portanan dia 24 di april 2009 y di su inicio e tabata un exito sin igual, pa su forma diferente di interaccion cu esnan presente. Tur cu a yega di presencia un encuentro na Hofi Literario, a keda impresionado y emocionado cu e idea pa tin un luga riba nos isla unda tin espacio pa un y tur desahoga su mes como escritor, poeta, musico, declamado of contado di storia. Diasabra noch esaki a keda reafirma un bes mas ora a scucha presentacion di Grupo La Escala, un agrupacion musical inicia pa Maruja Forero [qepd] y cu a duna un bunita presentacion di canticanan crioyo y di latino-america bou direccion di Hector Chichi Perez. Sigur un grupo cu lo aprecia mas biaha den nos Hofi Literario. Despues a sigui un dedicacion lyrico di Ruthy Vrieswijk na Yolanda Croes como iniciador di Hofi Literario y na sr. Booi como persona na kende e anochi tabata dedica. Gwendy Sneek a declama tres

poema di Lio na su manera acogedor di semper, mientras Munye Winklaar a declama e precioso poema "Nochi di Sorobon" skirbi pa e propio Lio Booi, un poema yen di suspenso y emocion. Sr. Drs. Angelo Tromp, den su funcion como staff di Departamento di Cultura, a duna un relato di e trabou cu Lio a eherce na Instituto di Cultura unda el a gradici Lio pa su esfuerso riba tereno di arte y cultura aki na Aruba. Den un relato separa por lesa mas di e homenahe aki na Lio. Grupo E Motibo bou guia di Ruben y Yolanda a presenta e cantica cu Lio mes a compone, esta "Chanita" cu a pone tur hende canta cu smak. Un sorpresa agradabel a resulta ora publico a haya oportunidad di bin padilanti y no menos cu cinco persona a declama diferente poesia. entre nan Sr. Hector Perez, Nelly Robles, Isdella Arends y Mayra Lopez. E ultimo aki a deleita publico cu e poema "Lenga" di e gran talento Arubano [qepd] sr. Julio Maduro, como tambe un poesia chistoso cu a pone tur hende hari. Miriam Tonk-Croes, conoci pa su scala di poesia cu e sa foi cabes, a declama e poesia na Hulandes yama "Het verhaal van de haring", un poema cynico di un autor desconoci cu ta conta di e bida di un haring cu a namora di un oester, perde cabes por completo pa despues haya su morto ora e oester a invit'e pa drenta den su hogar pa despues dal e cocolishi sera, cortando e haring su cabes limpi afo. E poema ta spierta tur hende pa no perde cabes manera e haring ora namora ya cu bo ta core riesgo di wordo 'guiyotina'. Na final Yolanda Croes a presenta sr. Lio Booi su Simia di Glas bon mereci pa su aporte na cultura di Aruba durante casi un siglo. Tambe Sra. Vda Avelina Croes, mama di Yolanda y dama-protectora di Hofi Literario, a ricibi un Simia di Glas. Sra Croes a planta un simia durante e



promete Hofi Literario, cu ya a crece bira un mata. Ta trata di un cawara spaño cu por crece bira un palo grandi, igual cu Hofi Literario lo crece y laga su flor y raisnan atras pa nos futuro generacion di autor, poeta, musico, amante di arte y literatura. Hofi Literario tin su grupo fiho cu tey mane un clabo tur biaha, entre nan personahenan di nos comunidad amante di literatura, arte, drama, musica cu ta encanta cada bes atrobe di e ambiente suave sin pretencion, pero di calidad halto di locual ta wordo presenta. Yolanda Croes ta manda palabra di danki ta bai na Desiree Correa pa su contribucion na Hofi Literario, na su yiu y nietonan pa nan yudansa impagabel pa haci Hofi Literario un delicia di poema y musica cada bes atrobe; na su ruman Ruben pa pone su systema di sound disponibel tur biaha y na Garrick pa diseña e invitacion y pa su potretnan cu por aprecia riba www.scolidiidioma.org bou di 'Gallery'. Finalmente e no por a keda sin gradici e miembronan di prensa cu tabata presente, demostrando asina nan continuo aporte na proyectonan di 'nation building', algo cu Hofi Literario indudablemente ta. Riba e potretnan adunto por aprecia

imagennan di e anochi un di nos grandinan, sr. Hubert Lio Booi.